

Moción pa solicitar una cai col nome de la deportista Sara Rocés

La xugadora de hoquei llangreana ye una de les meyores deportistes asturianos y amuesa siempre'l so compromisu col conceyu.

Llangréu ye un conceyu con una tradición deportiva bultable. De les cais y barrios de los sos distritos y pueblos salieron, nel últimu sieglu, clubes y deportistes con grandes éxitos a nivel nacional y internacional. De la mesma manera, Llangréu ye –o, a lo menos, habría ser–, un conceyu que reconociere los méritos de les sos vecines y vecinos, a tolos niveles: dende la política hasta'l deporte, ensin dexar de llau la cultura o la solidaridá.

Volviendo a la nuestra tradición deportiva, paez evidente que'l fútbol ye'l deporte con más pesu ente la nuestra xente. Trátase de l'actividá más practicada y tamién la más siguida a nivel social, amás de la que cunta con más reconocencia, tanto ente les vecines y vecinos como de la mano de les propies instituciones. De toles maneres, el fútbol nun ye l'únicu deporte con raigañu nel conceyu. Otros, como'l tenis, el baloncestu, la ximnasia o'l hoḡ quei sobre patinos, cunten tamién con muncha importancia.

El deporte, como actividá saludable y con munchos beneficios pa la mocedá, tien que promovese ente los neños y les neñes. Sobre manera ente ellos, ente les muyeres, qu'avecen a ver que los sos llogros nun reciben los mesmos aplausos que los masculinos y inclusive lleguen a sentise espulsaes de dalgunos práutiques deportives.

Poro, si queremos construyir una sociedá meyor, un Llangréu más xustu, sanu y igualitariu, el fomentu del deporte y, sobre too, de la práutica deportiva ente les moces, tien de ser una de les polítiques a siguir y coles que comprometese per parte de la totalidá de los grupos políticos. Hemos tamién defender la presencia de los deportes más minoritarios, p'amosar a tola sociedá que nun esiste namás que'l fútbol. Entidaes como'l CD Patinalón, con un puxu importante nel nuestru conceyu, son prueba d'ello.

Falando del deporte en Llangréu, paez obligatoriu facer referencia a la figura de Sara Rocés. La xugadora de hoquei, con namás 21 años, ye una de les deportistes llangreanes y asturianos más importantes de la historia en cuantes a los títulos conquistaos. Campeona de Lliga, de Copa, de Supercopa, de Copa d'Europa col so club, pue presumir tamién de medayes cola so seleición en campeonatos internacionales.

Por tolo anterior, dende Aina proponemos al Plenu l'aprobación d'esta moción al traviés de los siguientes alcuerdos:

La xugadora de
hoquei llangreana
ye una de les
meyores
deportistes
asturianos y
amuesa siempre'l
so compromisu
col conceyu.

1. Da-y el nome de dalguna cai del conceyu a la xugadora Sara Rocés, teniendo en cuenta la so importancia a nivel deportivu y les consecuencias positives qu'esta reconocencia pue tener pal deporte femenín y pa los deportes minoritarios; como permite l'artículu 5 de la Ordenanza que reglamenta la institución y apurrimientu de títulos, condecoraciones y distinciones honorífiques del Conceyu de Llangréu.
 2. Pidir a les Alministraciones públiques, incluyíu'l Conceyu de Llangréu, el fomentu de la práutica deportiva ente la mocedá, sobre manera ente les muyeres.
 3. Pidir a les Alministraciones públiques, incluyíu'l Conceyu de Llangréu, el fomentu de los deportes minoritarios, permitiendo la so visibilización ente la sociedá.
 4. Collaborar con toes aquelles asociaciones y organizaciones que trabayen pola igualdá ente muyeres y homes nel deporte y en tolos aspeutos de la sociedá, amás de coles qu'apuesten pol espardimientu de los deportes minoritarios.
-